



**Z A P I S N I K**  
**32. sjednice Komisije za vanjsku trgovinu i carine**  
**Predstavničkog doma Parlamentarne skupštine BiH,**  
**održane 21. 5. 2009.**

Sjednica je počela u 14 sati.

Sjednici je predsjedavao predsjedavajući Komisije Slavko Jovičić.

Sjednici su prisustvovali članovi Komisije: Jozo Križanović, Mehmed Suljkanović, Šemsudin Mehmedović, Salko Sokolović, Hadži Jovan Mitrović i Željko Kuzmanović.

Opravdano su odsustvovali Ekrem Ajanović i Jerko Ivanković Lijanović.

Sjednici su prisustvovali: Dragiša Mekić, Dušan Nešković i Reuf Hadžibegić, pomoćnici ministra vanjske trgovine i ekonomskih odnosa BiH (u daljnjem tekstu: MVTEO), Šefika Tutundžić, šef Odsjeka za carinske tarife u MVTEO, Samir Sabljica, šef Odsjeka u MVTEO, Dragiša Stanković, član Konkurencijskog vijeća, Željko Kovač, viši stručni saradnik u Uredu za veterinarstvo, Inga Dujmović, državni inspektor u Uredu za veterinarstvo BiH, Zoran Brkić, viši stručni saradnik u Sektoru za odnose s javnošću PSBiH, Dobrinka Savić, stručni saradnik u Komisiji za vanjsku i trgovinsku politiku, carine, saobraćaj i komunikacije Doma naroda PSBiH, Radopmir Marjanović, stručni savjetnik u Komisiji, Nihada Hadžić, stručni saradnik u Komisiji i Emira Češljar, sekretar Komisije za vanjskih trgovinu i carine.

Za sjednicu Komisije predložen je i jednoglasno usvojen sljedeći

**D N E V N I R E D**

1. Usvajanje Zapisnika 31. sjednice Komisije;
2. Razmatranje Prijedloga zakona o izmjenama i dopunama Zakona o konkurenciji, predlažać: Vijeće ministara BiH na osnovu člana 104. Poslovnika Predstavničkog doma, radi dostavljanja Mišljenja o principima predloženog zakona predsjedavajućem Predstavničkog doma;
3. Realizacija Zaključka s 50. Sjednice Predstavničkog doma povodom Informacije o poplavama u Popovom polju, rijeci Krupi i na području Hutovog blata (zaključci s održanog sastanka u Općini Ravno, 11.5.2009., i obilaska terena poplavljenih područja);
4. Tekuća pitanja:
  - a) Realizacija zaključaka s 31. sjednice Komisije o prijedlogu mjera za pomoć peradarima BiH, predlažać: Ministarstvo vanjske trgovine i ekonomskih odnosa BiH,
  - b) Upoznavanje s dopisom člana Predsjedništva BiH Željka Komšića u vezi s Prijedlogom zakona o zaštiti domaće proizvodnje unutar CEFTA-e, od 27.4.2009.,
  - c) Informiranje članova Komisije o Prijedlogu zakona o izmjenama i dopunama Zakona o carinskoj tarifi Bosne i Hercegovine, upućenog Upravnom odboru UIOBiH, radi odobrenja, od MVTEOBiH 16.4.2009.,
  - d) Zabilješka sa sastanka održanog 7.5.2009. u Sarajevu s predstavnicima klubova uzgajivača i ljubitelja bosanskog bika i predstavnicima Ureda za veterinarstvo BiH.

### **Ad. 1. Usvajanje Zapisnika 31. sjednice Komisije**

Zapisnik 31. sjednice Komisije usvojen je jednoglasno, bez primjedbi.

### **Ad. 2. Razmatranje Prijedloga zakona o izmjenama i dopunama Zakona o konkurenciji, Predlagač: Vijeće ministara BiH, na osnovu člana 104. Poslovnika Predstavničkog doma radi dostavljanja Mišljenja o principima predloženog zakona predsjedavajućem Predstavničkog doma**

Predsjedavajući Slavko Jovičić je u uvodnim napomenama istakao da je Vijeće ministara BiH, 29.4.2009., uputilo Parlamentarnoj skupštini BiH Prijedlog zakona o izmjenama i dopunama Zakona o konkurenciji za razmatranje po osnovnom zakonodavnom postupku.

Kolegij Predstavničkog doma je, u skladu s članom 101. stav (2) Poslovnika, odredio Komisiju za vanjsku trgovinu i carine kao nadležnu za razmatranje Zakona. Ustavnopravna komisija Predstavničkog doma razmatrala je Prijedlog zakona o izmjenama i dopunama Zakona o konkurenciji i utvrdila da postoji valjan ustavnopravni osnov za njegovo donošenje te da je Prijedlog zakona usklađen sa Ustavom BiH i pravnim sistemom.

Uvodne napomene o razlozima izmjena i dopuna Prijedloga zakona dao je, u ime predlagača, Samir Sabljica. Istakao je da je obaveza Ministarstva da radi na poboljšanju zakonodavstva u oblasti konkurencije i da se na inicijativu Konkurencijskog vijeća krenulo u poboljšanje teksta Zakona predloženim izmjenama i dopunama za šta postoji puna politička saglasnost.

U raspravi su učestvovali: Samir Sabljica, Željko Kuzmanović i Dragiša Stanković.

Željko Kuzmanović pitao je da li su ove izmjene i dopune usklađene sa zakonodavstvom Evropske unije? Dragiša Stanković odgovorio je da je Prijedlog zakona u potpunosti usklađen sa zakonodavstvom Evropske unije.

Sekretar Komisije Emira Češljarić istakla je da je Ustavnopravna komisija Predstavničkog doma na osnovu Jedinostvenih pravila za izradu pravnih propisa imala tehničkih primjedbi na Prijedlog zakona, koje su ispravljene, te da, nakon usvajanja Zakona u prvom čitanju u Predstavničkom domu, teče rok od 15 dana za podnošenje amandmana na Zakon.

Nakon rasprave, Komisija je **jednoglasno podržala principe predloženog zakona.** Na osnovu člana 104. Poslovnika Predstavničkog doma, Komisija će dostaviti mišljenje predsjedavajućem Predstavničkog doma.

### **Ad. 3. Realizacija Zaključka s 50. sjednice Predstavničkog doma povodom Informacije o poplavama u Popovom polju, rijeci Krupi i na području Hutovog blata ( zaključci s održanog sastanka u Općini Ravno 11.05.2009. i obilaska terena poplavljenih područja)**

U uvodnim napomenama predsjedavajući Komisije podsjetio je da je na osnovu Zaključka usvojenog na 50. sjednici Predstavničkog doma, održanoj 1.4.2009., Komisiji vraćeno mišljenje o Informaciji o poplavama u Popovom polju, na rijeci Krupi i području Hutovog blata. Komisiji je naloženo da odredi delegaciju u kojoj će biti predstavnici Predstavničkog doma i Ministarstva vanjske trgovine i ekonomskih odnosa BiH radi obilaska prostora (hidroelektrane, općine, agencije), te da u dodatnom roku izrade konačno mišljenje o Informaciji o poplavama u Popovom polju, na rijeci Krupi i na području Hutovog blata i dostave ga Predstavničkom domu. Dalje je istakao da je na, 31. sjednici Komisije, određena delegacija za obilazak prostora, a za organizaciju i koordinaciju zadužen je sekretarijat Komisije. Nakon sastanka u Općini Ravno, 11.5.2009. i obilaska terena, predloženi su zaključci koji su navedeni u Zabilješci kao materijal za ovu sjednicu Komisije.

U raspravi su učestvovali: Martin Raguž, Reuf Hadžibegić i Šemsudin Mehmedović.

Martin Raguž zahvalio je svim učesnicima na konstruktivnom pristupu problemu poplava i istakao da je odlazak na teren sve učesnike uvjerio u kompleksnost ovog pitanja i nepostojanje integralnog upravljanja sistemom. Također je rekao da ne može prihvatiti poruku da su poplave i ubuduće moguće te da je potrebno uraditi hidrograme za cijelu godinu.

Istakao je da je saglasan sa zaključcima iz Zabilješke, s tim da je potrebno zaključak iz tačke

3. usaglasiti unarednih nekoliko dana.

Reuf Hadžibegić istakao je da je za ovaj sistem vezano više problema među kojima su nepostojanje regulatornog okvira za upravljanje na nivou BiH, potraživanje Republike Srpske od oko 100 miliona eura, što je na sudu, tehnički problemi u Republici Srpsk vezani za razmjenu podataka i sl.

Nakon rasprave, Komisija je jednoglasno prihvatila sljedeći p r i j e d l o g:

- do sljedeće sjednice Komisije usaglasiti treći stav zaključaka iz Zabilješke sa sastanka u Općini Ravno, od 11.5.2009., kada će ova komisija donijeti mišljenje o Informaciji o poplavama i dostaviti ga Predstavničkom domu
- u istom mišljenju navesti zaključak iz alineje a) iz prethodnog mišljenja Predstavničkom domu iz zaključka sa 30.sjednice Komisije, održane 30.3.2009.

#### **Ad. 4. Tekuća pitanja:**

##### **a) Realizacija zaključaka s 31. cjednice Komisije o prijedlogu mjera za pomoć peradarima BiH, predlažać: Ministarstvo vanjske trgovine i ekonomskih odnosa BiH**

Komisija za vanjske trgovinu i carine Predstavničkog doma razmatrala je Prijedlog mjera za pomoć peradarima BiH koji je sačinilo MVTEO u saradnji s predstavnicima proizvođača i prerađivača, a na osnovu zaključka 31. sjednice Komisije za vanjsku trgovinu i carine.

U raspravi su učestvovali: Dušan Nešković, Mehmed Suljkanović, Jozo Križanović, Slavko Jovićić, Željko Kuzmanović i Željko Kovač.

Nakon rasprave o Prijedlogu mjera koje su sadržane u 12 tačaka, konstatirano je da je ograničena nadležnost na nivou države u pravcu zaštite domaće proizvodnje i podsticaja, što je regulirano zakonima entiteta. Većina predloženih mjera je stalnog karaktera, a u tač. 5. i 6. mjera konkretno je definirano koje su obaveze državnih upravnih organizacija, odnosno agencija iz oblasti veterinarstva, sigurnosti hrane i zaštite zdravlja bilja.

Dva trenutno aktuelna problema su pojačati kontrolu kroz analizu prisustva genetički modificiranih organizama, uvoza pilećeg mesa i sojine sačme koja je glavni proteinski izvor biljnog porijekla koji se uvozi iz Republike Hrvatske, kao sirovina i koncentrat.

Komisija je jednoglasno podržala Prijedlog mjera i z a k l j u č i l a da:

1. Ministarstvo vanjske trgovine i ekonomskih odnosa BiH, odnosno Sektor za poljoprivredu prati provođenje predloženih mjera;

2. na osnovu člana 25. Zakona o poljoprivredi, ishrani i ruralnom razvoju Bosne i Hercegovine („Službeni glasnik BiH“, br. 50/08, koji je stupio na snagu 1. jula 2008.), MVTEO posreduje kod nadležnih organa entiteta i Brčko Distrikta BiH da usklade svoje propise u sektoru poljoprivrede, ishrane i ruralnog razvoja. Rok za njihovo usklađivanje je godina dana od dana stupanja na snagu navedenog zakona, što do sada nije učinjeno;

3. nakon što Vijeće ministara BiH, na osnovu člana 23. stav (2), a u vezi sa članom 23. stav (5) navedenog Zakona, dostavi Parlamentarnoj skupštini BiH godišnji Izvještaj MVTEO o stanju u sektoru poljoprivrede, ishrane i ruralnog razvoja BiH, Komisija za vanjske trgovinu i carine ponovo će razmatrati realizaciju zaključaka u pravcu predloženih mjera.

##### **b) Upoznavanje s dopisom člana Predsjedništva BiH Željka Komšića u vezi s Prijedlogom zakona o zaštiti domaće proizvodnje unutar CEFTA-e, od 27. 4.2009.**

Kolegij Predstavničkog doma dostavio je Komisiji navedeni dopis iz Kabineta člana Predsjedništva BiH Željka Komšića koji je uputio ambasador Republike Hrvatske u BiH Tonči Stančić u kojem su predloženi razlozi neprihvatljivosti Prijedloga zakona o zaštiti domaće proizvodnje u okviru Sporazuma CEFTA koji se nalazi u drugom čitanju u Domu naroda PSBiH. Međutim, ministar vanjskih poslova i evropskih integracija R Hrvatske Gordan Jandroković je, 7.5. 2009., uputio ministru vanjskih poslova BiH Svenu Alkalaju protestnu notu u vezi s eventualnim usvajanjem navedenog zakona koji bi imao za posljedice kršenje principa slobodne trgovine i regionalne saradnje, dovodeći u pitanje ispunjavanje preuzetih obaveza BiH zadatih okvirom procesa stabilizacije i pridruživanja.

Nakon rasprave o sadržaju navedenih pisama, odnosno protestnih nota Republike Hrvatske, Komisija ih je, imajući u vidu da nema poslovničke mogućnosti za daljnje radnje o navedenom zakonu koji je usvojen u Predstavničkom domu, primila je k znanju.

Jednoglasno je z a k l j u č e n o da se o navedenom obavijesti Kolegij Predstavničkog doma, s molbom da o zauzetom stavu obavijesti člana Predsjedništva BiH Željka Komšića.

**c) Informiranje članova Komisije o Prijedlogu zakona o izmjenama i dopunama Zakona o carinskoj tarifi BiH upućenog Upravnom odboru UIOBiH, radi odobrenja, od MVTEOBiH 16.4.2009.**

Ministarstvo vanjske trgovine i ekonomskih odnosa BiH je, na osnovu Zaključka 44. sjednice Predstavničkog doma Parlamentarne skupštine BiH, održane 21. januara 2009., zaduženo da, u saradnji sa VTKBiH, sačini listu proizvoda prema potrebama i drugih proizvođača i prerađivača iz oblasti poljoprivredne proizvodnje, metalne i tekstilne industrije i sl. koji imaju potrebu za dobivanje olakšica, bez plaćanja carine za uvoz određenih kvota sirovine s ciljem podsticaja i konkurentnosti domaće proizvodnje.

U ime MVTEOBiH, Šefika Tutundžić istakla je da je su 61 podnesenog zahtjeva proizvođača metalne i tekstilne industrije za uvoz repromaterijala 33 opravdana, koja su obrađena i dostavljena 16. 4.2009. UOUIOBiH i DEIBiH radi dobivanja odobrenja, odnosno mišljenja o predloženim izmjenama i dopunama navedenog zakona a samo je Ured za zakonodavstvo Vijeća ministara BiH izvršio svoju obavezu.

Komisija je, imajući u vidu navedeno, jednoglasno z a k l j u č i l a da uputi urgenciju:

Upravnom odboru UIOBiH i Direkciji za evropske integracije BiH da u najkraćem roku dostave odobrenje, odnosno mišljenje Ministarstvu vanjske trgovine i ekonomskih odnosa BiH o predloženim izmjenama i dopunama Zakona o carinskoj tarifi BiH radi daljnje procedure utvrđivanja konačnog teksta i dostavljanja na razmatranje i usvajanje Parlamentarnoj skupštini BiH.

O navedenom zaključku obavijestiti Kolegij Predstavničkog doma.

**d) Zabilješka sa sastanka održanog 7.5.2009. u Sarajevu s predstavnicima klubova uzgajivača i ljubitelja bosanskog bika i predstavnicima Ureda za veterinarstvo BiH**

Sastanak je održan 7.5.2009. s predstavnicima klubova uzgajivača i ljubitelja bosanskog bika i predstavnicima Ureda za veterinarstvo BiH povodom predstave koju su e- mailom uputili Komisiji za vanjsku trgovinu i carine radi podrške za hitno donošenje podzakonskih akata kojima će biti dozvoljeno održavanje tradicionalnih bosanskih korida.

Sekretar Komisije dala je potrebna objašnjenja i istakla sljedeće:

1. Komisiji je predloženo da usvoji predloženi zaključak s održanog sastanka, koji glasi: Zadužuje se Ureda za veterinarstvo BiH da, u saradnji s predstavnicima klubova, uzgajivača bosanskog bika, izradi i Ministarstvu vanjske trgovine i ekonomskih odnosa BiH predloži donošenje pravilnika kojim bi se regulirala oblast tradicionalnog nadmetanja bikova-koride.

2. Prijedlog zakona o zaštiti i dobrobiti životinja i amandmane na Zakon razmatrale su ustavnopravne komisije kao nadležne, usvojila ga je usvojila Parlamentarna skupština BiH i stupio je na snagu 8.4.2009. Međutim, odredbom člana 4. Zakona, između ostalog, posebno se zabranjuje borba bikova, te nije bilo u nadležnosti Komisije za vanjsku trgovinu i carine da razmatra navedenu materiju.

3. Zaključkom Doma naroda PSBiH zaduženo je Vijeće ministara BiH, resorno ministarstvo i Ured za veterinarstvo BiH da u podzakonskim aktima navedenog zakona dozvole organiziranje tradicionalnog takmičenja bikova ta da Vijeće ministara BiH sagleda aspekt tradicionalnog takmičenja i manifestacija i pokrene izmjene Zakona o zaštiti i dobrobiti životinja.

4. Ured za veterinarstvo BiH je, 30.4.2009., zainteresiranim udruženjima uzgajivača i ljubitelja bosanskog bika uputio instrukciju o tome kako bi se moglo odobriti održavanje tradicionalnih korida u BiH.

Na osnovu dodatnih informacija i obrazloženja predstavnika Ureda za veterinarstvo BiH, Komisija je primila k znaju zabilješku sa sastanka te zaključila da prekine daljnji rad.

Sjednica je završena u 16,30 sati.

Sekretar Komisije  
**Emira Češljarić**

Predsjedavajući Komisije  
**Slavko Jovičić**